

欽
定
全
唐
文

欽定全唐文卷四百四十三目錄

李晟

諫赦李懷光疏

誅田希鑒獻狀

于頔

尊祀武成王議

程浩

雷賦

鳳翔府扶風縣文宣王新廟記

相州公宴堂記

盧朝徹

謁嶽廟文

侯冕

同朔方節度副使金紫光祿大夫試太常卿兼慈

州刺史王府君神道碑

呂牧

書軸賦

子擊磬賦

齊論

趙州刺史何公德政碑

李舟

謝敕書賜臘日口脂等表

謝敕書賜厯日口脂等表

爲崔大夫陳情表

爲崔大夫請入奏表

爲崔大夫請入奏表

與齊相國書

獨孤常州集序

欽定全唐文卷四百四十三

李晟

晟字良器隴西臨洮人年十八從軍以戰功累遷左羽林
大將軍大厯初拜開府儀同三司兼左金吾衛大將軍涇
原四鎮北庭都知兵馬使封合川郡王德宗在奉天詔晟
赴難授尚書左僕射同中書門下平章事收京城拜司徒
改封西平郡王貞元三年拜太尉中書令五年畫像凌煙
閣九年薨年六十七冊贈太師諡忠武

諫赦李懷光疏

赦懷光有五不可河中抵京師三百里同州制其衝兵多則示未信少則力不足忽驚東偏何以待之一也今赦懷光則必以晉絳慈隰還之渾瑊康日知又且遷徙二也兵力未窮忽宥反逆四夷聞之謂陛下兵屈而自罷耳今回紇拒北吐蕃梗西希烈僭淮蔡若棄強示弱以招窺覲三也懷光旣赦則朔方將士悉復敘勲行賞追還縑粟今府庫空殫物不酬滿是激其叛四也旣解河中諸道還屯當有賜賚賞典不舉怨言必起五也今河中米斗五百芻橐且罄人餓死墻壁間其大將殺戮幾盡圍之旬時力窮且

潰願無養腹心疾爲後憂臣請選精兵五千約十日糧可以破賊

誅田希鑒獻狀

田希鑒悖逆成性怙亂作奸頃因兇徒遂構邪計昨者蕃眾効義左右官軍馮河祇供將期收復而涇原惡黨醜正害賢陷翻軍城殘賊忠義明班奔竄纔得全生河清忠勤終見肆毒職繇希鑒扇動逆類猖狂負國家之深恩受朱泚之節制包藏狡逆莫甚於斯臣昨者巡邊將欲安撫而希鑒潛勒步騎或在要衝名爲迎臣實欲拒捍臣先令精

銳以奪其勢次遣宣諭以慰其心雖云鴟張未暇設施跡其前後實不可容男萼等罪惡旣同謹並按軍令訖臣幸當重寄累受寵榮除惡之義思去本根報國之誠敢誅無禮況俯臨邊境須用忠良若容此人無以懲革

于頔

頔字休明河南人累官京兆尹徙河南尹三遷工部尚書以太子少師致仕卒

尊祀武成王議

當今兵革未偃宜崇武教以尊古重忠烈以勸今欲有貶

損非激勸之道也追尊王位以時祠之爲武教之主若不
尊其禮則無以重其教也文武二教國並宜立廢一不立
況其典禮之制已歷二聖今欲改之恐非宜也

程浩

浩代宗朝官駕部郎中

雷賦

雷車闐闐六合喧吼驟風雨於南極旋星雲於北斗蹙東
海以波蕩擺太山而瓜剖玉石至堅切如泥濘松柏至勁
粉爲枯朽鼉皮擊考而魑魅睽睽龍顏抵觸而鯨鯢奔走

陶鑄造化之鑪而鴻毛萬像幹運乾坤之柄而嬰孩羣有
由是言則九鼎瑣細三山培塿鼎鼎可以指揮蓬萊可以
背負殊不測離蒼天之遠近當懼驚魂在元雲之幾重徒
勞矯首及夫白日雨歇長虹霽後列缺緩轡元冥假手蓄
殘怒之未洩聞餘音之良久而小子之繆學敢獻疑於左
右今若爲善惡之宰主操賞罰之休咎胡不扶持顏閔之
羶行天闕桀跖之龜壽罪一亂臣懲天下之兇醜旌一孝
行激天下之悌友法高懸於堯典刑不試於周后何必霹
靂潛窟之龍養育吠堯之狗

鳳翔府扶風縣文宣王新廟記

天地吾知至廣也以其無所不覆載日月吾知至明也以其無所不照臨江海吾知至大也以其無所不容納料廣以寸管測景以尺圭航大以一葦廣不能逃其數明不能私其質大不能亡其險偉哉夫子生後於天地而知始亡先於天地而知終非日非月光之所及者遠不江不海潤之所浸者博三代禮樂吾知其損益百王憲章吾知其消息君臣以位父子以親家國以肥鬼神以享道未可詮於無物釋未可證於無生一以貫之者我先師夫子見之矣

夫子聖人也帝之聖者曰堯王之聖者曰禹師之聖者曰
夫子堯之德有時而息禹之功有時而窮夫子之道久而
彌彰遠而彌光用之者昌捨之者亡昔否於宗周今泰於
皇唐不然者何被袞而裳垂旒而王者哉扶風古縣也在
京之西環渭而北望標關輔之首雄壓劇秦之大有尉曰
袁弁者學稽漢室名振伊鼎跡泯味道力餘攻文其爲政
也剛而能斷柔而能吐其理身也靜爾深谷澹然澄江紆
大君之明命注賢相之清選寅奉聖旨廓新祠堂殿宇岑
立宮墻島峙睥尊儀於兩楹羅禮貌於十哲砌蘭有主院

柏分行徂庭自肅入室知敬陳牲牢而在旅間籩豆而無
算天下大軍之後時弊而沒禮域中小康之前俗媮而迷
歸懿文以戢兵尚德以銷戰使人從善遠惡而不自知大
哉袁氏之子其用心也至矣邑宰李公政事練達德音和
理風聲樹而不丕變𡵓頌樂而不支縣丞主簿尉等琅琊王
畿黍稷公器覽容色窺相公之明鏡整髻鬣趣相公之龍
門雲霄坐馳鳴躍可俟浩客自帝輦聿來鳳翔入境而醉
聞佳政歸歟而食味尤績前尉許擎起予能事春秋之徒
如何勿書時大厯二年某月日記

相州公宴堂記

公宴堂昭儉也高平王尚猶侈焉先是王師出征邊遽告
聳百戰俠骨委於溪澗九遷殤魂飛在草莽上聞而憐之
詔我薛公爲刑部尚書兼御史大夫保釐於東建節於鄴
也時兵不滿百馬惟數駟府微棲糧家僅餘堵公乃掃除
糝政濟活人命一年而墻宇興二年而耕稼盛日就月將
遂臻夫小康崇其宴堂者不得已而營也豈無黜幕尚爾
能可久豈無丹楹愛爾不愆素豈無錯石所慮轉他山豈
無貨財所重仍舊貫其始也經構侏儒迴移藥櫨率取諸

大壯未暇於全模其終也巍然雲橫燦以星鋪禮行於九
賓並坐於千夫不設窗戶且防於壅閤不加剗厠且陋夫
華皖水之以視其平坦墨之以視其方直役也應時宜其
善頌成之匪日所謂悅使若軍中凱樂羣下胥宴六佾咸
在三懸旣張清醕引淮芳饌羅岳自上而王侯公伯迨下
而卑隸庖翟進則酣而不荒退則服之無斃及四賢講德
七子會文拂羽扇而納涼揮素琴而待月對水得江湖之
性捲簾見天地之心寂寂無譁綽綽有裕相與先評所職
次徵他詞驟揚厥懿徐攻其短君子以爲薛公義誘於衆

仁和於物誘進則眾洽和同則物安俾夫聳善觀過罔不由斯堂也向使卑不合度儉不中禮適足尤孟孫之室美諷夷吾之山節浩耽靜辭蒲脂車訪舊入境而七德有餘及庭而三歎不足幸承君之惠顧又因此以賀之操觚斐然於是乎記時大厯三年六月旬有五日也

盧朝徹

朝徹大厯九年官華陰縣令

謁嶽廟文

唐大厯九年甲寅季春月哉生明華陰令盧朝徹下車散

齋浹日精意選擇元辰吉蠲饋饕靡愛斯牲敬修祀事端
笏祠宇縉紳奠饋敢告金天王粵山嶽配天聰明正直豈
直禍淫實真祚德朝徹不佞獲領茲縣職監灑埽躬備陳
薦顧嗟菲薄性受愚蒙清是家風所遺方乃天誘其衷與
眾難合于時不容向老厲志如何遭逢抱拙恬澹委運窮
通倘力于政王降百祿稍私其身王肆厥毒福謙害盈則
仰嶽靈不識不知何敬神爲拜手稽首兮氣莫敢怠躋庭
啐酒兮儼然有待松柏颼颼兮屑宰若來容衛森森兮髣
髴如在

侯冕

冕大歷中朝散大夫行河中府功曹參軍上柱國

同朔方節度副使金紫光祿大夫試太常卿兼慈

州刺史王府君神道碑

府君諱履清字履清京兆萬年人也王惟聖後系出田宗

功闕也五代祖立行工部郎中更靈夏夔潭等四府都督

封晉陽闕早世考尚賓歷原州參軍事定遠城兵曹參軍

贈金紫光祿大夫闕藝尚德業脫畧諸子憲章五經處吏

事也能果斷居朋友也無忌闕以桓文之勲伊呂之重開

建大府邦家長城知其名而辟之闕中幽寧三道營田等

務致使後來難繼前政知慙豈止充物當時苟闕力寘夫

恤弟疾篤割其股肉則所部靡草上之風矣秋麥兩歧靈

芝闕旌表府君課効多此類也以前後功累遷官凡十五

任而至金紫光祿闕汾陽王以吉昌濁河上流邊郡善地

戎守夷落易動難安永言輯綏闕帝可其奏仍乘傳走郡

又敷異術載底吉祥猛獸度河而去境感我善闕兩穗卿

雲炳而五色瑞圖驟披臺使攸屈於是歸禾之詔藏在闕

命賢愚同歸以大厯十一年正月廿四日遘疾不起薨於

官舍之正寢享

闕

兄履堅朝散大夫守豐州長史弟履濟

朝散大夫守慈州別駕長子綸朝

闕

葬合度以十二年二

月廿日還葬於高陵之奉正原禮也名成於代宦達於

闕

匪敢愧詞迺爲銘曰

聖祀百世奕世其昌有媯之後言育於姜陳宗不守命氏

惟王滔滔秦淮爲我

闕

世濟其美芬芳竹素跌宕杞梓君

家盛事不可勝紀天步未清

闕

上介部有仁兄岐麥挺秀

靈芝發生邊郡近胡邑無完郭荆棘誰翦豺狼未驅

闕

皇

帝曰俞下車幾何畏愛更作允文允武爰究爰度畜牧新

泰謳歌薄洛以激闕
竄孝子負土嘉禾有畔吉凶同域生
死一貫倏忽長逝嗚呼永嘆舊邱還墓遠道闕
日羽葆秋
煙一掩黃泉於萬億年

呂牧

牧東平人永泰二年進士自尚書郎出爲澤州刺史

書軸賦

方輿之靜也軸居其重大輅之轉也軸當其用夫履端抱
圓何所適而不中則有飾以金玉交以丹漆乍駢首於青
案或周身於縹帙雖偶提而偶攜亦無固而無必故能退

尺則不短進寸則不長得隨時之舒卷合君子之行藏劉
向校書之時偏薰蘭氣揚雄草元之所獨染芸香其質則
微其用不淺若輪轂之負載同戶樞之開轉能藏飛鶴之
書更掩迴鸞之篆妙撫謙以處厚每求伸而先卷遭秦則
玉質斯焚入漢則石渠可踐別有韜黃公之秘畧懷王烈
之素書探禹穴而誰見被金滕而有諸仲宣之藏萬卷惠
子之藏五車非我軸之何寶能懷文以自如豈俟脂膏後
運柶鑿方虛彼所恃而有待假經籍爲蘧廬

子擊磬賦

以敬明爾志人
將辨之爲韻

大哉將聖樂天知命憲章文武昭宣孝敬遊道藝之門觀
魯衛之政知禮文之述作繫王道之衰盛將有託於知音
故先擊其浮磬翕如始奏泠然激揚旁達草木獨調宮商
律中乃節而信清引而越以長何一氣之立則若五色而
成章羽可以振振獸可以蹒蹒神人以和舍此奚取樂懸
之位斯焉是將諧協於國風本一於心始將此易俗非爲
悅已作於朝而君臣同和聽於家而少長咸喜不達情者
莫究其理不賞音者莫知其旨非有爲而作焉豈苟樂而
爲爾噫斯道之行如磬之聲合於制度發以清英應小大

以隨擊拊原始終不可將迎伊物情之滯隔莫不由此而發明謂爲藝以吾不試語之道而知吾志固非繫而不食豈止垂之如墜曾見訪於萇宏反受嗤於荷蕢彼往而不返欲潔其身如樂之無節則可奪倫義有味於反舌耳無聞於日新何沒沒於隱者亦硜硜於小人必也審音居然大辨動應而溥暢虛中而獨善使石聲無定則我心可轉初未明乎弛張庸詎議乎深淺一雅一變正聲久遣子擊此者亦屢歎之唯聖有作闡教命夔乃知樂正雅頌復在於明時

齊論

論大厯九年趙州判官通直郎行昭慶縣丞

趙州刺史何公德政碑

惟六祀大鴻臚何公再踐諸侯奉若明命尹茲趙人人賴
惠浹聿興訶之頌之懿鑠布濩逖聽洋溢恒之伯受鉞統
牧實旌異政俾幕賓繕部員外郎兼侍御史王公載揚休
烈垂裕長世刻貞石無以節省順人欲也序婉辭無以勤
思崇茂德也其文見乎意曰惟恪修連率之職擇茲令典
明于東土敦敘邦教撫柔元元次云咨我良二千石叶漢

宣之議激流揚波輝光奕葉式遵讜言用集器宇益稱慎
行克和厥中服勤於理簡易其俗君子曰王公之筆直而
不汙夫采其英聲覩其儀形聲乃頌而不腆其實形乃表
而不忒其素或曰理道之要龔黃未優成師之最衛霍猶
劣吾儕小人嘗與二三子稽覈今古否臧時政格於羣議
莫出公右由是訟庭肅肅無畱事焉郡佐寮吏望公高軌
而已公牆宇外疑管庫內嚴非禮不動唯義是訓見危受
命全其節臨難抗志忘其身所以馳騫喪亂之間寵錫和
平之際昔堯命四嶽商朝諸侯周建牧伯作六瑞以等將

勸親人莅事惟明公其至矣州人屬荐飢之歲如享公之膏粱寒露之時如服公之衣裘存安在危肅理在擾豪右姦宄伏其威繩樞寡弱懷其德而使商農工賈朝夕從事不異視而遷焉公嘗曰未戰修備兵之勢也未用資置物之理也推此例而理之萬貨之源可見矣故詢諸體物較之成用徵於前古其誰僞之夫頌德紀功之事不書其細而煥然昭明大體也論等忝竊幕吏敢據無窮魯史之末固亦有製豈直敘述遺事益以廣揚不朽兼諸官屬具紀碑陰

李舟

舟字公受水部員外郎岑之子以尚書郎奉使出爲虔州刺史封隴西縣男

謝敕書賜臘日口脂等表

臣某言今日日中使內府丞張某至伏奉敕書賜臣及軍將臘日面脂香袋紅雪澡豆等殊私忽臨捧戴無力手足蹈舞心魂若驚臣某中謝伏惟陛下以節遇嘉平律當凝閉爰布發生之德猥承頒賜之榮膏液廣霑降中天之渥澤生香遠及蘊西域之芳馨苦口以愈沉疴澡身以滌塵

垢無任感戴屏營之至

謝敕書賜厯日口脂等表

臣某言中使至伏奉敕書手詔賜臣新厯日一本口脂面
脂紅雪紫雪金花各一枝并賜臣春衣一副牙尺一枚大
將衣兩副宸翰忽臨殊賜兼及蠻夷捧詔抃躍輕生將吏
受恩誓心効死臣某中謝伏以令節嘉平曲承寵賚凝膏
芳潤獲滋蒲柳之容寶器珍奇遠承日月之照謬當重寄
星歲屢移恩積邱山功無毫髮沉元陰云暮斗柄初迴已
霑芳澤之恩兼降中和之服頒賜尺於王度布新厯於荒

陬躍抃徘徊罔知所報

爲崔大夫陳情表

臣某言臣素以庸虛百無所取肅宗委臣方面擢尹兩京
蓋以天寶末年祿山干命臣未有職位客遊陳州賊兵過
河官吏奔竄臣義集驍勇亟摧賊鋒以閭閻之人當幽薊
之卒勢相懸倍不顧死亡臣之輕生實著誠素今者回紇
代立求援聖朝陛下大布皇威加其冊禮爰膺將命實受
寵光又其道路無虞夏帳尤近擁旄仗節持憲珥貂銜非
常之詔書寵內附之蕃落去獲重貺歸成大勲雖潦倒之

人衰朽之士亦宜據鞍增氣叱馭前驅況臣常在軍戎未
至遲暮豈不欲保微臣之富貴求陛下之恩私哉其理必
至顛沛必至廢闕隱而不露何以事君臣往在宣州曾卒
得癘疾三日三夜都不知人自此以來發無時候或輕或
重或疾或遲此病所來得於風熱常因冒暑失食及冬衣
太溫兼食羊肉立即發動若過積之後更無菜蔬苦寒之
地須加狐貉又於藥物不得及時則微臣不得全活且螻
蟻之命誠何足言但恐敗事有失前期稽恩廢禮伏願陛
下以臣此表徧訪朝臣言若涉虛事近辭避伏願加以斧

金史卷一百一十三
二
鎖肆諸市朝且使將來永息欺詐無任哀懇迫切之至

爲崔大夫請入奏表

臣某言臣以久違闕庭歲請朝覲在宣州日伏奉德音且以河南用兵許臣事平入奏尋蒙寵命移鎮浙東臣自至越州旋經歲序瞻戀宸極道路轉遙俯察微躬疾病加劇實慮溘先朝露永謝明時昨者隨表便行冀蒙聖恩昭許續奉進止所在令迴伏迫宸嚴不敢冒進臣防身寡智處衆多尤但恐譴謗之聲日聞天聽浸潤之漸將迴聖慈憂疹相并死亡無日臣管州郡幸無逋懸西河之間又已寧

靜伏願陛下察臣誠懇許臣朝謁實冀犬馬之疾歸上國而蠲除風波之言仰皇明而昭鑒無任懇迫之至

爲崔大夫請入奏表

臣某言臣一昨初承國哀號慕罔極已陳哀懇請赴山陵伏奉批答上遵遺旨不許奔會元宮甫閉攀扈無由永惟舊恩實延巨痛陛下自登寶位日月重光百靈昭蘇萬物咸覩臣限所守僻在海隅遐瞻闕庭未獲稱慶陛下湛恩雨施大號風行繁徭頓除窮海知化臣管內州郡幸獲安帖在臣使務必有常規將臨元會之期倍切朝宗之戀伏

願許臣躉趨天闕獲覲龍顏進稟命於聖君退宣風於遐
壤臣死生無恨榮願之至

與齊相國書

三十三官足下近年已來宰臣當國多與故人禮絕僕以
禮處足下則足下長者僕心未忍欲以故人處足下則慮
悠悠之人以僕爲詭我欲修書逡巡至今忽承足下出守
夔國於蒼生之望則爲不幸爲足下謀之則名遂身退斯
又爲佳僕昧時者謹以爲賀但鄱陽雲安道阻且長音塵
寂蔑永以三歎僕所疾沈痼方率子弟力農爲世疎矣足

下亦焉能不疎僕耶足下素闕僕所知之其於得喪固怡如也然朝臣如足下寡矣明主豈當不察之耶惟強飯自愛珍重珍重

獨孤常州集序

傳曰物生而後有象象而後有滋滋而後有數數成而文見矣始自天地終於草木不能無文也而況於人乎且夫日月星辰天之文也邱陵川瀆地之文也羽毛彪炳鳥獸之文也華葉彩錯草木之文也天無文四時不行矣地無文九州不別矣鳥獸草木之無文則混然而無名而人不

能用之矣人無文則禮無以辨其數樂無以成其章有國者無以行其刑政立言者無以存其勸誠文之時用大矣哉在人賢者得其大者禮樂刑政勸誠是也不肖者得其細者或附會小說以立異端或雕斲成言以裨對句或志近物而玩童心或順庸聲以諧俚耳其甚者則矯誣盛德汙蠱風教爲蠱爲蠹爲妖爲孽噫文之弊有至是者可無痛乎天后朝廣漢陳子昂獨泝積波以趣清源自茲作者稍稍而出先大夫嘗因講文謂小子曰吾友蘭陵蕭茂挺趙郡李遐叔長樂賈幼幾洎所知河南獨孤至之皆憲章

六藝能探古人述作之旨賈爲元宗巡蜀分命之詔厯厯如西漢時文若使三賢繼司王言或載史筆則典謩訓誥誓命之書可彷彿於將來矣嗚呼三公皆不處此地而運蹇多故惟獨孤至常州刺史享年亦促豈天之未欲振斯文耶小子所不能知也已矣常州諱及有遺文三百篇安定梁肅編爲上下帙分二十卷作爲後序常州愛士而肅最爲所重討論居多故其爲文之意肅能言之比墓博陵崔貽孫又爲神道碑悉載行事而痛其不登論道之位崔公剛而好直其詞不黨君子謂之知言昔班孟堅美漢得

人之盛曰文章則司馬遷相如又曰劉向王褒以文章顯是則四君子者有漢之文雄歟然而遷無鄉曲之譽虧大雅明哲保身之美相如薄於貞操有滌器受金之累向無威儀遺文以繆而身幾不免衰多爲歌頌當時議者以爲淫靡不急其他無聞焉大較詞人多陷輕躁否則悞狹迂僻於事放弛其能蹈履中道可爲物主者寡矣孰與常州發論措詞皆王霸大畧孝悌之至達於神明善與人交久而敬之當官正色不畏強禦加之以仁惠愛物吏民敬畏而文又如足其餘則二君旣言之矣今重錄崔氏之作

綴於篇末云爾

欽定全唐文卷四百四十四目錄

沈迴

武侯廟碑銘

并序

李去泰

資州刺史叱干公三教道場文

韓秀榮

對給地過數判

梁鎮

諫罷違典左道宮祠表

盧虔

御史中丞晉州刺史高公神道碑

韓翃

爲田神玉謝茶表

謝追贈父表

謝追贈母表

謝追贈父官表

謝敕書賜臘日口脂等表

爲田神玉謝詔葬兄神功畢表

爲田神玉謝不許赴上都護喪表

爲田神玉謝兄神功於京兆府界擇墓地表

爲田神王母太夫人謝男神功塋賜錢及神玉領

節度表

爲田神玉謝賜錢供兄塋事表

爲李希烈謝留後表

爲鳳翔李尚書請使人拜掃表

代人至渭南縣降服請罪表

代人奉御批不許請罪謝恩表

裴抗

魏博節度使田公神道碑

欽定全唐文卷四百四十四

沈迴

迴大厯中進士

武侯廟碑銘

并序

皇帝御極貞元三祀時乘盛秋府主左僕射馮翊嚴氏總
帥文武將佐洎蒙輪突蹄之旅疆理南鄙營軍沔陽先聲
馳於種落伐謀息其狂狡於時威武震疊虜騎收跡塞垣
肅修烽燧滅焰士無保障之役馬無服轅之勞重關弛橈
邊轂棲野我師惟揚則有餘力乃昇高訪古周覽原隰敬

修茲廟式薦馨香光靈若存年祀浸遠雖簫鼓忻奏邑里
祈禳而風雨飄飄祠堂落構土階莫數尺之崇庭除無表
丈之隙登降不能成禮牲玉不得備陳頽墉露肩灌木翳
景樵蘇滿徑麋鹿走集馮翊曰丞相以命世令德功存季
漢遺風餘烈顯赫南方邱壠南山實在茲地荒祠偏倚廟
貌境裂非所以式先賢崇祀典也乃發泉府徵役徒撤編
菅芟薙叢薄是營是葺衆工羣至繚以高墉隔閼芻牧增
以峻宇昭示威神靈英昔賢像設如左翼翼新廟日至而
畢顧謂小子揚榷前列銘於廟門曰在昔君臣合德興造

功業有若伊尹相湯呂望興周夷吾霸齊樂毅昌燕是數
君子皆風雲相感垂裕來世嘗以爲阿衡則尊立聖主天
下樂推尚父則上讐獨夫諸侯同舉管氏藉強齊之力以
宗周無令王樂生因建國之資贊燕昭爲奧主君臣同道
僅能成功惟武侯遭時昏亂羣雄競起高光之澤已竭桓
靈之虐在人遇先主之短促值曹魏之雄富能以區區一
州介在山谷驅羸卒輔孱主衡擊中原撐拒強敵論時則
辛癸惡稔語地則燕齊勢勝遷夏殷者未可校功霸桓昭
者不足侔力向使天假之年理兵渭汭其將席卷西邑底

綏東周祀漢配天不失舊物矣洪伐彰彰宜冠古今倬軼
前烈其誰曰不然武侯名跡存乎國志今之羣書姑務統
論大畧敘我新意至於備載爵位追述史傳非作者至德
也今則不書其銘曰

桓靈濟虐雲海橫流羣雄蜩起毒蠱九州天旣厭漢人思
伐劉沸渭交爭存亡之秋其誰存之時維武侯伊昔武德
踈足南陽退藏於密不曜其光有時有君將排垢氛魚脫
溪泉龍躍風雲先主纘緒天下三分馥馥德馨悠悠清塵
前哲後賢心跡暗淪建茲新廟式是梁岷

李去泰

去泰大厯中朝請郎行成都府廣都縣丞

資州刺史叱干公三教道場文

四維無涯元黃混其體精氣相射陰陽孕乎中寒暑推移
日月所以交會道德敷暢仁義所以表儀卽有金人流化
開悟方便之門寶籙闕宗沖融自然之理法本無別道亦

強名隨化所生同歸妙用故知二儀生一萬象起三殊途
而歸體本無異至哉廣運元之又元方丈之間示我三教
察其規制卽資州刺史叱干公作禮虔誠大厯二年十月

奉爲我國家之所造也公六德居邦千里作鎮心貫白日
志勵秋霜出敵忘家長安不修甲第以身許國閭域獨作
長城公之忠也每厭黑山尚屯常以丹忱望闕所經幽異
志誠感神上啟靈祇誓清壤裔公之義也今南方已定全
蜀無虞戰馬歸山眾落附欵公之力也襟帶無外書軌永
同至於海隅罔不成若公之闕也所以建此道場上答神
理公之信也天地合應鬼神共資磅礴山川悠遠祠宇闕
字智力誰啟此門巍巍乎視現不窮蕩蕩乎思量無及人
世幻影盡證虛無眾聖真容超然利見無言說法無色現

身不動如如能生此會黃金照耀上有白毫放光紫氣氤
氲下有真人現世漢崇哀聖已表儒風唐號文宣彌尊德
位仙雲法雨併灑虛空東序西庠盡涵霧露別爲世界更
有神形手持寶刀常親護法枝葉本根則後周之苗裔也
位尊茅土再忝文王之名班列將軍特闕龍驤之號羅列
四部變現十方迴向之間不覺恍惚想之疑遠人理並行
聽之無言風樹傳法悲夫造化未出陶鈞稽首歸依願離
生死踟躕勒石用紀斯文其詞曰

西方大聖爲法現身不生不滅無我無人甘露灑雨水闕

淨塵心澄智海道引迷津湛然不動永絕諸因混元難測
杳杳冥冥恍惚有物想像無形闕天辯位四方闕星中含
仙道下育人靈法傳不死空餘老經廣學成海渙文麗天
光闕十哲軌範三千獲麟悲鳳讚易窮元首唱忠孝跡重
仁賢其道不朽今古稱先

韓秀榮

秀榮代宗朝人

對給地過數判

甲給地過數所由曰更耕之田

掌地之圖辨邦之數分疆畫野度土居民將以均其賦役
一其征繕俾上下而爲宜體磽肥而施法甲之所給類彼
均人度以物情頒其職事我疆我理雖差百畝之田如茨
如梁何乖一易之地且稽諸王制考彼周官當務審其徵
求而克均其政令李悝爲魏方興地力之能管仲相齊式
虞軍實之要更耕而獲豈昧隨時受以公田雅符通典若
科之罪勿使能殖

梁鎮

鎮代宗朝爲昭應令仕至司門郎中

諫罷違典左道宮祠表

臣聞國以人爲本害其本則非國神以人爲主虐其主則非神故昔之聖王所以極陳理道明著祀典將愛其人而慎用其材力敬其神而虔恭於祠祭故神享其明德而降之福人受其大賚而盡其力然後神人以和而國家可保也一昨蝨賊作孽水旱爲災雖王畿皆遍而臣縣最苦此則神之不能禦大災明矣又何力於陛下而得列祀典哉且以殘弊之餘當凶荒之歲丁壯素出家入仕羸老方飛芻輓粟今但供億王事已不堪命更奔走鬼道何以聊生

臣又聞天地之神尊之極者掃地可祭精意可享陛下亦何必廢先王之典崇俗巫之說走南畝之客殺東鄰之牛而後冀无妄之福陛下雖欲爲人祈福福未至而人已困矣其不可一也陛下不視昔者有道之君至德之后曷不卑宮室惡飲食恭已以遂萬物之性哉陛下今違神亭育之心竭人疲困之力如是又何從而致其福哉此其不可二也又陛下宗廟之敬極矣尚無一月三祭之禮今此獨爲則宗廟之靈將等以親疎校以厚薄陛下又何以言哉此其不可三也又天地婆父祀典無文言甚不經義無可

取若陛下特與大地建祖宗之廟必上天貽向背之責陛下又何以爲詞哉此其不可四也夫湫者龍之所居也龍得水則神無水則螻蟻之匹也故知水存則龍在水竭則龍亡此愚智之所同知矣今湫竭已久龍安所存陛下又崇飾祠宇豐潔薦奠爲去龍之穴破生人之產人且怨矣神何歆哉此其不可五也其道君三皇五帝則兩京及所都之處皆建宮觀祠廟時設齋醮饗祀國有彝典官有常禮蓋無闕失又何勞神役靈此其不可六也臣稽先王之典禮觀前聖之軌躅休咎豐凶災祥禍福必主帝王五事

不在山川百神此其不可七也臣伏察此弊頗知其由蓋以道士李國禎等動衆則得人興工則獲利祭祀則受胙三執則弄權是以鼓動禁中熒惑天聽踰越險阻負荷塗盛以日繫年無時而息曾不謂神功力空止竭人膏血以使人神胥怨災孽並生罔上害人左道亂政原情定罪非殺而何臣昨受命之時親承聖旨務存安緝許逐權宜誠願沉鄴縣之巫安流弊之俗其所興兩祠土木之功丹青之役三六之祭灑掃之戶謹明宣旨並以權宜停訖人吏百姓等知陛下以從善爲心嫉惡爲務蠲除不急剗革煩

金史卷一百一十四
苛皆喧呼於庭扑躍於路所徵糧糗無不樂輸臣伏以國
禎等並交結中貴狡蠹成性臣雖忘身許國不懼讒構終
恐賄及豪右復爲奸惡其國禎等見據狀推勘如獲賊狀
伏望許臣徵收便充當縣郵館本用其湫旣竭不可更置
祠堂又不當爲大地建立祖廟臣並請停其三皇道君天
皇伏犧女媧等旣先各有宮廟望請並於本所依禮齋祭
盧虔

虔舉進士歷御史府三院刑部郎中江汝二州刺史秘書
監元和中卒

御史中丞晉州刺史高公神道碑

大厯七年冬十有二月辛酉御史中丞前晉州刺史高公
薨嗚呼天柱折地維缺豈止梁木其壞泰山其頽乎中書
令汾陽王聞之衣及於寢門之外至哀不哭仰天久之曰
天喪余俾余何所依律苟在飲公之化食公之德莫不叩
心絕氣行號巷哭其月乙亥天王使中使來歸我公之賵
贈潞州大都督詔曰狐裘濯冠勤固無歇閉閣畱牘盡瘁
有終謂公有古人之風故貺公以古人之節傳曰知臣莫
若於君豈虛也哉公諱武光字叔良其先渤海人也曾祖

正初隋左金吾衛中郎將祖翰皇中散大夫常州長史皇
考莊皇左騎衛將軍代濟忠貞保乂王室累膺熊羆不二
心之佐盛德之後必有達者惟公生焉公則將軍之嗣子
也在厥初生自貽祐命弱而幹父長乃克家恥雕蟲而不
爲嘉從龍而或躍故能事親克諧於純孝弼主必著其大
忠忠孝並全社稷之衛也以申警之勤首職洛交郡安昌
府別將昭忠信也由是公忠壯自篤勤勞日宣爲國爪牙
在帝左右美爾攸績於嘉乃勲累遷至忠武將軍守左清
道率洎天寶末會幽燕階禍公密奏辨疑讐履霜之漸叩

血流地上濺御衣雖涉

闕

之諫不從而竭忠之誠克見帝

嘉乃節拜右羽林將軍知軍事及亂作公待罪闕下曰臣始知之不能糜碎身首啟沃聖聰俾賊猖狂藥不瞑眩誰之咎也敢忘其死帝遽錫公雜綵二百段瓶盤副焉曰子言無隱朕甚嘉焉言而不從朕之過也惟今之謀言姑將以爲親其年秋公陷賊境爲賊所得賊議焚太廟與清渠之役中使孫知古遇賊若爲釁鼓之事公節由義感忠以勇成危言勃如賊爾咸若是歲國廟不焚中使復命公之力也其有金鏃淫夷南冠繫俘咸賴逕續以永其命者可

勝言哉其時賊議公本我唐之盡臣也不可以握兵之要
恐通內外之言賊遂黜公出典故絳絳人聞公之至也公
來其蘇公之牧絳也我躬則閒雖外困賊命而內綏我人
億兆協心和樂且孺卒使包茅之貢日臻乎行在及王師
大來公志克遂墜城歸命乃享無疆之休易曰女子貞不
字十年乃字其是之謂乎入朝肅宗詔復位羽林是歲年
穀不登長安餓死相屬公颺言於上請出禁衛之米以頒
餓者上多之乃俾公司出納之恡翼日餓隸復蘇人賴家
給時謂之公政君遵於堯舜不然何博施之道廣耶越月

除奉先是邑也有不腆之賦戶人逋其邑三千公戾止未
幾戶人復歸如初屬虜難未已時奴剌拔我鳳州皇上類
能俾公康乂公於是乎始有剖符之寄公之始至克黜戎
難靖安西人踰月政成封內大理俾其禍疑之蓋及身於
仁壽之域矣其年秋有詔遷梁州刺史充山南道觀察初
商人吏那延西人之子也楸遷員來遇疾而卒遂殫所得
之資備送終之禮明日死徒數百人咸造公庭曰今有以
見死者之幸我如此不如死疑其餘字人之恤飲冰之潔
不書可知也君子曰高公荷天之百祿永終無斁由是汾

陽王美公之政無度寶應初以今上之命命公救濯於絳
加銀青光祿大夫絳人喜公之來如見父母戎首師乾光
皇甫大冲率徒數千居郡之南山食人馬牛奪人妻妾渴
日爲惡不彌虔劉洎公之下車旬時克浸仁風率復淳化
封域之內謐如也雖晉用隨會羣盜出奔舜舉咎繇不仁
者遠曷以爲比俄而汾晉阻兵關東漸弊脇權相滅鮮克
晉匡以公獨固大節仗大順初誘之以高位不從又逼以
白刃不從身幾見危節終不奪可謂風雨如晦雞鳴不已
上徐聞其忠壯也加特進守左金吾衛大將軍又轉開府

儀同三司試太常卿封渤海縣開國公食邑一千五百戶
加朝散大夫閒歲遇汾陽王論晉倒懸之急若涉水之不
濟由是上將公爲舟楫克濟其難公自是以利往爲晉康
侯加御史中丞夫晉陶唐之舊也介二大都之間達四康
衢之要賊臣之所讐斂王師之所蹂踐室盡閭閻田其荒
兮其有彼積之苗美哉之奐則爲武臣所有其秋興履畝
之役行比屋之稅撫弱憚獨不畏強禦晉人沐公之惠如
慶雲也一年逋逃復二年田疇闢三年之外中和之詠甘
棠之頌洋洋乎盈耳哉三年秋汾陽王復以公勤績克聞

於上上俾公以尹河府浹辰之內揚然有聲音晉人思公遺
愛銘頌貞石經始有典不日成之覩而思仁墮淚於下汾
陽王聞之復聞於上上詔公再造其晉加樂安郡開國公
公之至也大耄鼓腹而歌羣黎投杖而拜武人搃戈以馳
突樂正交鼓而和羅公旣喜迺如雲人亦沐公如雨風生
草偃政簡人和陶然日遂其性矣以明年冬汾陽王以秦
隴不關藉公以籌其策公罷侯於晉克揚西土之烈無何
遘癘虐疾遂歸休於宜平私第病日臻旣彌留銀青光祿
大夫兼絳州別駕趙公廉公之愛婿也素知其爲人名節

清峻氣宇冲邈臨終之日托以後事而誓言於公曰嗚呼
余不天余之生也克艱難昔往蹇之際不克抗臣節以死
王事繫老母之故賴皇鑒之明以汾陽王靈不汝疵瑕獲
保首領以免今死喪洊至逃遁無所汾陽王生成之恩不
得而答太夫人罔極之德何階而報天乎天乎誰察予之
心乎言終飲恨而歿享年六十有五夫人隴西李氏柔克
宜家坤儀訓內享年不永先公而逝大厯八年正月五日
詔贈郡夫人夫人以其月乙酉合祔於萬年縣鳳棲北原
禮也公六典大郡三掌禁兵清儉以立身貞固而獲歿誰

謂高氏無君子斯焉取斯太夫人隴西李氏迴已斷之腸
就終焉之禮夫人天水趙氏誓同穴之志爲未亡之人嗣
子長曰昇次日昱成在童胤集蓼茹荼哭不絕聲盡而繼
之以血也虔忝吏未曾工爲文受命於愛婿趙公俾光昭
公之令德逖聽遺愛搢札而書不覺涕之沱若跪而銘曰
天贊皇明而公克生欽若王事有終於成乾乾惕厲蹇蹇
忠貞三主禁兵六牧專城於穆性情洋洋頌聲九有作程
惟皇之楨胡不終吉今天降疾禍昇福黜幽啟明室佳城
鬱鬱備物秩秩送終於畢不思其出隴月宵弔郊雲曙密

吁嗟高公千秋此室

韓翃

翃字君平南陽人侯希逸在淄青李勉在宣武皆辟佐幕府後以駕部郎中知制誥終中書舍人

爲田神玉謝茶表

臣某言中使某至伏奉手詔兼賜臣茶一千五百串令臣分給將士以下聖慈曲被戴荷無階臣某中謝臣智謝理戎功慙還寇前恩未報厚賜仍加念以炎蒸恤其暴露榮分紫笋寵降朱宮味足蠲邪助其正直香堪愈病沃以勤

勞飲德相歡撫心是荷前朝饗士往典犒軍皆是循常非
聞特達顧惟何幸忽被殊私吳主禮賢方聞置茗晉臣愛
客纔有分茶豈知澤被三軍仁加十乘以欣以忭感戴無
階臣無任云云

謝追贈父表

臣某言伏奉詔書追贈臣亡父先臣司空者慶因出震澤
及重泉禮命式加哀榮兼極臣某中謝臣遭家不造過庭
無聞仰先聲而彌高勤遺訓而靡及徒因積善率勵小心
位忝統戎寵加錫賞此誠陛下孝理爲本德教所先因作

解之明威布追遠之厚德禮降幽壤位崇上公遂使展罔
極之哀受恩感於庶物襲有後之慶撫事愧於揚名旣申
報養之懷載竭移忠之孝臣子誠願備極於斯無任哀感
之至

謝追贈母表

臣某言伏奉詔書追贈臣亡母李氏楚國太夫人者承命
祇感哀榮罔極臣某中謝臣年甫強仕禍積靡恃痛吹棘
之莫喻瞻風樹以永懷雖忝分茅之榮實由斷織之訓動
興怵惕感戴劬勞豈謂陛下推恩成仁廣孝致理寵延隴

隤秩開國封使微臣沒地有辭終天無恨旣申欲報之志
更切匪躬之誠餘生萬死豈答元造無任受恩屏營哀感
之至

謝追贈父官表

臣某言伏奉恩制追贈臣亡父通直郎行京兆府醴泉縣
尉成名禮部郎中者渥澤流於幽隧哀榮集於私門兢惶
拜命涕咽無措臣某中謝先臣素履貞白早謝昌時臣雖
叨竊班榮不及祿養每懷風樹之痛莫報蓼莪之恩伏惟
皇帝陛下深宏孝理澤被存歿特降殊私爰加褒贈幽靈

知感結草有期微臣戴恩畢命思報不任荷懼懇悃之至

謝敕書賜臘日口脂等表

臣某言中使某至伏奉敕書宣慰臣及將士等并賜臣母
申國太夫人口脂一合面脂一合澡豆一貼并賜臣溫香
一合兼賜將士口脂等聖慈稠疊感戴無階臣某中謝臣
絲髮効微乾坤施重因時受賜覩物知恩寵及澡身榮加
潤色恭嘗御藥心則和平親受國香人其服媚飾犬羊之
賤質齊鴛鴦之增慶恩必及於慈親澤兼流於宿將感戴
洪恩無任抃躍屏營之至

爲田神玉謝詔塋兄神功畢表

臣某言臣亡兄某以今月二十日詔塋永畢感恩追慟肝心如裂臣某中謝臣亡兄俯歸幽窆更軫皇慈易以大名賜夫秘器王人加贈京兆護喪道備哀榮念深勲舊霍光故事斯則爲優謝安殊禮彼何足貴臣限總留務虔恭聖私不及親扣泉扃盡哀號之義迴趨陛下謝褒寵之恩慟哭轅門五情分潰臣無任感激之至

爲田神玉謝不許赴上都護喪表

臣某言奏事官潘洽迴伏奉敕書手詔兼宣進旨不許臣

輒離所部又以臣腳弱無力伏奉批表以軍府政殷藉卿
鎮輯不赴上也懇誠莫遂祇命哀惶臣某中謝臣兄永
辭昭代俯及塋期臣請解戎章歸護喪事義雖聞上恩不
聽卑掩泣轅門飛魂隴樹外慙形影內切肝腸千兩送車
臣空瞻望九原臨穴臣不躬親一叫骨驚三時心死伏以
大君有命重鎮無人俾臣割哀勗臣留務宣恩拜手祇事
撫膺又荷聖慈追懷前効俯悲簪屨軫念松楸更使改期
貴先遠日幽明銜荷感謝無階無任哀感之至

爲田神玉謝兄神功於京兆府界擇墓地表

臣神玉言今月三日得上都留後報稱伏奉敕牒臣亡兄神功宜令所司於京兆府界擇地安葬仍令京兆尹充監護使勾當恭承渥澤俯及遠期拜手感恩摧心增慟臣某中謝臣亡兄任崇寄重方報聖恩祚薄釁深早違昭代天慈悼往朝典飾終日月有時乾坤曲施榮加昭葬寵荷官給榮如曹氏京兆開阡貴比霍家初連象冢義光前古禮極哀榮在臣一門盡出望外載悲載躍無階上酬臣願號赴私門親護喪事緣總留務不敢自專今見催促行裝伏待進止云云

爲田神玉母太夫人謝男神功塋賜錢及神玉領

節度表

妾張氏言奏事官潘洽迴伏奉手詔以妾亡男贈司徒神
功塋日有期特承哀問兼賜神玉手詔所賜本道錢四萬
貫並令妾以下聖慈曲被感戴哀絕妾中謝妾隨子東征
銜恩北闕累承雨露載啟山河同覲之親幸及貴登僕射
異勤之母不見生拜司徒忽荷聖慈寵加存沒敬姜年暮
俯矜哭子之哀庾翼才微尚使領兄之衆殊悲望外旦慰
目前況將逼遠期特垂渥澤更切撫存之義兼迴贈往之

資赤仄盈庭紫泥在篋痛而受賜哀以爲榮庶神功有知
應感安親之道魂其無昧更酬報國之誠載號載悲不勝
感絕妾無任悲戴之至

爲田神玉謝賜錢供兄塋事表

臣神玉言伏奉手詔兼奉敕牒賜錢五千貫文給臣亡兄
神功塋事用拜手感恩闔門悲戴臣其中謝臣兄始終効
節存歿銜恩智悼在堂已加朝禮滕公居室又荷天慈錫
其九府之錢寵以重泉之路多踰千萬榮冠一時去病飾
終空陳元甲孔光送往薄賜黃金在臣私門寵極前古但

盡哀號之禮寧憂窀穸之儀臣無任感戴悲躍之至

爲李希烈謝留後表

臣某言中使梁某至伏奉今月日制書授臣使持節蔡州
刺史兼御史中丞充淮西節度觀察度支營田等使留後
特達睿恩殊常寵寄權兼專席榮重褰帷稠疊聖慈心魂
戰越臣某中謝臣少小孤遺又無藝術叔父忠臣勵以成
人自屬艱難親承任使備牙門之將總帳下之兵耳目腹
心臣當職分毫釐絲髮臣合知委而依阿從事曖昧居心
羣小用權臣不能規諫三軍潛怨臣不能警覺蒼黃之際

遂成禍階十起之恩低回未報一朝之難逼迫見留白刃
交前脫身無路謝安內舉竊効馳驅疏廣告歸獨乖隨從
在臣情地何以自容雖早殄仇讐纔雪家怨而自慚面目
有負國恩豈謂降以殊私副茲重鎮上承朱邸之令下奉
玉帳之謨權副九州地方千里在臣微眇難繼威聲豈臣
竊賣舊勲謬膺殊澤撫心泣血何地自容特望聖恩察臣
微懇選朝廷舊德副節度重權許臣歸骨關西死且不朽
爲鳳翔李尚書請使人拜掃表

臣某言臣聞子之能仕父教之忠臣仕雖無聞忠冀盡力

當陛下至理之日偶四方無事之時臣幸揚名清朝全節
聖代於臣之分榮感多焉而罔極之心未遑省告伏以先
臣墳墓遠在定州道路所經瞻馳靡及臣自入宿衛三十
四年頃者師旅雖寧武臣分閫臣職叨禁近事絕私情宏
覆之德靡所不容而兢懼之誠實難自盡空懷怵惕之感
莫申展奠之儀今寰宇廓清憂疑必釋當天下交泰之際
是人神叶吉之期臣寄重藩維不合上請今遣弟某官某
專拜掃以道途所近便取北路赴定州輒披懇誠無任兢
惶云云

代人至渭南縣降服請罪表

臣某言臣自出邊鄙素無才術頃因寇難累効驅馳遂荷殊私謬膺重寄介於偏僻密邇寇讐備厯艱危得全節義遼陽移拔趙北掃除皆仗威靈非臣力致幸逢清廓輒自寬閑麾下不虞舟中生變坐貽顛沛實愧無謀縱欲粉身於何塞責陛下念臣微効未即書刑許歸朝廷俾露誠懇王畿日近聖問荐臨雖承雨露恩深其若叩山罪重闕廷進對臣亦胡顏鉄鉞就誅甘當碎首謹於路側降服而囚且十年以來秉戎律者其於綏撫或有乖方不待刑章蔽

於部曲隱而不數斯輩亦多臣以負罪雖同免罹其禍幸
全腰領伏俟天誅臣之爲榮死亦不朽臣無任懇款之至
代人奉御批不許請罪謝恩表

臣某言奏事官蘇翼迴伏奉聖造答表勒臣即復章綬速
赴闕庭捧讀震驚心魂爽越臣某中謝臣智謝統戎罪深
負國本期死所翻荷生成恩承主偏法爲臣屈迴謝九原
之路仰銜再造之功拜命之初不勝抃躍臣即匍匐拜謝
闕庭無任感戴

裴抗

抗平州人官京掾

魏博節度使田公神道碑

理天地者陰陽統邦國者文武才得其位政由其理則元
后作聖九有以寧其或紐斲解而復維運偶否而終泰是
以周十世而生方叔唐八葉而傳太傅保乂藩服昭宣王
度嘉言大猷鬱爲國楨太傅諱承嗣其先有媯之後自敬
仲奔齊五代而昌因采田而氏焉異才茂德繼踵而至其
後議郎疇哭劉虞墓讓盧龍勲義聲洋洋焯於古今公則
議郎之裔今爲北平人也曾祖堪隋州從事祖璟皇鄭州

別駕烈考守義皇安東副都護贈戶部尚書皆恭肅明哲
純懿貞良纂邁德之仁傳有後之慶公則尚書之第六子
也元和間生其德直方剛毅中正根於天常鍾海岳之靈
抱清淳之氣幼尚擊劍長而事邊度山川之險易計戎狄
之勇怯沉機潛運藏用待時開元中林胡犯邊公始以兵
術聞節將急而求公乃假公平盧先鋒使即以偏師敵
之公大破夷落斬首萬計朔漠之人恃公爲雄戎帥以捷
聞特拜公左武衛郎將策殊勲也仍前平盧先鋒使擒俘
斬首一月三捷戎陬氣懾邊徼塵清改左武衛中郎將遷

左清道率拜左武衛將軍昭武功也天寶季年逆帥安祿
山竊幽陵之甲以叛驅劫忠良易其守心跼犬吠主大肆
凶逆料天下敵已唯公一人遂乃臨以刀鋸邀其質任爰
授兵要置之腹心公迫以凶威計無從出竊謂所知曰昔
龔勝閉口君房殺身無補於時自擠溝壑乃呼天飲泣忍
死從權將圖不朽之勲以顯大忠之節時寇陷洛陽遐邇
震駭大縱虜奪以弭凶徒唯公禁戢屬兵託以戒嚴他盜
時大雪滿營間無徑術逆帥巡行諸部躬自勞寒至公之
營疑其無人公乃介冑轅門出卒羅拜閱數伍籍不缺一

人逆亂之徒尤加敬憚爰及刑獄取決於公寇逆亂常法
令苛慘纖辭詆告每陷忠良皆以阿旨入法爲已誠察理
辨情爲携貳公將謀知免且欲雪冤每至議讞必歸情實
至於免鼎鑊脫桎梏者不可勝數冀其違忤稍見疎遠而
逆帥以爲平允得當仁德歸厚信重獎助又倍於常其後
賊亂蜂起互相吞戮祿山流膏安慶絕兇思明陷刃朝義
傳首羿浞旣平日月貞明公雲龍交感霖雨將作誓爾有
衆同歸聖朝誠意克從大節斯立時代宗在宥天下降衷
於人載覽歸欵特加誠順即日除戶部尚書御史大夫莫

州刺史復以莫州地褊不足安眾特遷魏州刺史貝博滄
瀛等州防禦使公榮懼感泣潛然涕流荷天之休誓答元
造中以狀聞上收其忠錫以旄鉞真拜魏博等州節度觀
察處置等使初懷恩之討朝義也深結歸命之帥陰有將
叛之心及恃功不虔造節方兆虎據汾晉寇於太原乃分
使河朔連扇羣帥邀我同惡示以師期羣帥獻欵決計於
公公曰吾儕所以修睦僕固者將欲藩翰王室懷寧遠邇
竭股肱之力報亭育之恩乃翫兵左道自任姦慝有死而
已吾蔑從之俱精練成師以順王命臣子之職也由是羣

帥感悟率德相從械繫行人顯與之絕暨聲問達於四境
干紀之師索然氣奪是以懷恩喪子於榆次棄甲於西河
北走胡庭埋魂絕域抑有由也蹈危而正可謂文武三傑
精剛百練者也惟帝念忠拜公尚書左僕射賞有功也遷
大司空旌有德也初公之臨長魏郊也屬大軍之後民人
離落閭閻之內十室九空公體達化源精潔理道宏簡易
剋煩苛一年流庸歸二年田萊闢不十年間既庶且富教
義興行魏自六雄升爲五府拜公爲魏州大都督府長史
仍加實封一千戶以陟明也而緇黃耄耆詣闕陳乞請頌

德衰政列於金石帝曰俞以命先臣門下侍郎王縉謨紀
功烈錫魏人以碑之其明年請立生祠而尸祝之公執謙
沖抑而勿許茂厥丕績秩遷太尉疇咨補職爰立作相公
拜賜荷寵若墜泉谷誓將率先啟行斬伐不臣殄彼昆夷
復我河湟然後挂冠都門告老歸第嗚呼有志不就昔人
所痛致君之道未展大夜之期俄及大厯十三年春二月
邁天倫之戚茹痛而疾秋九月甲午薨於戎府享年七十
有五天子悼舟楫之沉覆邦人號轅棟之崩摧罷輟市朝
哀慟中外諫議大夫蔣鎮冊贈太保臨弔賻禮有加等夫

人富春孫氏齊莊之德備矣開越國之封列魚軒之貴降
年不永先公即世其年十二月十四日得吉兆於魏州貴
鄉縣金堤鄉吳河里之原遷夫人之殯歸同穴之期而祔
焉禮也公孝敬忠信慈仁睦友造次顛沛一以貫之在家
如嚴君撫人如慈父違其子而進猶子逾十起之愛傳八
命之榮則宋穆不獨賢伯魚有慚德積載餘慶並時而昌
允子十一人長子維皇魏州刺史次子朝左神武將軍知
軍事檢校右散騎常侍兼御史大夫三子華皇太常少卿
駙馬都尉尚永樂長公主永樂薨復尚新都長公主贈工

部尚書四子繹皇試大理評事五子綸皇監察御史裏行
七子繪八子純不幸早世九子紛皇河南叅軍十子紳殿
中侍御史內供奉十一子縉殿中侍御史內供奉皆文武
奕世忠孝傳家或至大官或階清級誕生檢校尚書右僕
射同中書門下平章事駙馬都尉鴈門郡王襲實封五百
戶贈司空緒則公之第六子也纂承鴻勲不忝前列開戚
里之貴繼茅土之封繡轂朱輪光輝日新聖朝覃孝理之
恩軫聞輦之念復追贈公太傅復贈魏州大都督相國烝
烝孝思霜露增感復以生祠故事具表上聞天子彰善崇

德乃許追立爰命詞臣禮部侍郎呂渭徵撰休烈厥功茂
焉相國生工部尚書兼魏州大都督府長史御史大夫充
魏博相貝瀘衛等州節度管内度支營田觀察處置等使
季安繼踵象賢克荷丕構玉立冰潔孤高不羣駸駸逸足
長途萬里勲賢接武今古罕倫嗚呼開國承家之義顯矣
翼子謀孫之道光矣沒而不朽非公而誰抗賓事戎麾出
入三世目覩芳躅耳聆嘉聲不愧之詞誠非諂上敢刊樂
石傳於無窮詞曰

維岳雄氣鍾於崆峒委和孕靈降生我公於惟我公其德

崇崇處暗不昧在明則通

其一

運屬昌時功居顯位天子命

我莅於東魏榮傳曳履寵拜端揆乃領司空俄登太尉

其二

爰立作相俾屏我王訓節制師威不庭方爲國之紀爲人

之綱教義聿修德音孔揚

其三

上天降災奪我元老邦國殄

瘁誰云壽考梁木其壞嘉言是寶隴月阡松荒烟蔓草

其四

墮淚碑在生祠廟存澤流福子慶被孝孫日下甘棠風清

德門刻此金石傳芳後昆

其五